

օժտւած Յ հոգինոց յատուկ մարմին՝ վարելու համար պատերազմի դործը: Մարմնի անդամներ ընտրեցին վարչապետ ու ղինւորական նախարար Ե. Գեգեչկորին, ելեւմտական նախարար՝ Ս. Կարճիկեանը և ներքին գործոց նախարար՝ Ն. Ռամիշվիլին: Ի վերջոյ, Սէյմը, վաւերացրեց նաև — միշտ միաձայնութեամբ — Ժորդանիայի ներկայացրած նախագիծ—կոչը անդրկովկասեան ժողովուրդներին: Առաջ ենք բերում այդ մարդկային վաւերագիրը ամբողջութեամբ, իբրև արտայայտութիւն այն ժամանակւայ տրամադրութիւնների:

Անդրկովկասեան Սէյմից՝ Անդրկովկասի բոլոր ժողովուրդներին:

Անդրկովկասի՝ քաղաքացիներ:

Հնչել է ժամը, երբ վճռուած է բախտը մեր ընդհանուր հայրենիքի:

Դուք գիտէք, թէ ինչ պահանջներ է ներկայացրել մեզ թիւրք կառավարութիւնը:

Մեզանից պահանջում էին ընդունել Բրեստ—Լիտովսկի դաշնագիրը, որ կնքւել է առանց Անդրկովկասի ժողովուրդների գիտութեան, մի դաշնագիր, որը այժմ՝ Ռուսաստանում չի ճանաչում ոչ մի մարդ, որին թանգ է հայրենի երկրի ազատութիւնն ու պատիւը:

Մեզանից պահանջում էին մեր լաւագոյն բերդը՝ Կարսը և մեր ամենալաւ նաւահանգիստը՝ Բաթումը:

Մեզանից պահանջում էին պարպումը մեր երեք շրջանների՝ Կարսի, Արդահանի և Բաթումի:

Մենք արինք ամէն ինչ, որ խղաղ ճանապարհով, բանակցութիւնների միջոցով ստիպենք թիւրք կառավարութեան՝ հրաժարւել այդ յաւակնութիւններից: Զգտելով խաղաղութեան պահպանման՝ մենք յանձն առինք մեծ դոճեր ու զիջումներ: Մենք յայտնեցինք թիւրքիային, որ պատրաստ ենք զիջել համարեա բոլոր բաներում: Բայց մենք չէինք կարող հրաժարւել Բաթումից, մեր միակ ծովային ելքից, միակ ճանապարհից: Եւ մեր բոլոր ճիւղերը՝ վէճը լուծելու խաղաղութեամբ՝ խորտակեցին թիւրքիոյ յամառութեան առջև:

Թիւրքիան պնդում է իր սկզբնական պահանջների վրա: Նրա նպատակն է՝ կտրել Անդրկովկասը արտաքին աշխարհից, խեղդել ու ստրկացնել նրան: Յանուն այդ նպատակի են առաջ շարժւում թիւրք զօրքերը: Կանգնեցնել նրանց կարող ենք միայն զէնքի ուժով:

Մեր առջև հարց է դրւած շարունակելու բանակցութիւնները թիւրքիայի հետ ա՛յն միջոցին, երբ նրա զօրքերը մտնում են մեր երկրի խորքերը, թէ՞ ընդհատել և զէնքին յանձնել Անդրկովկասի ազատութեան պաշտպանութիւնը:

Թիւրքիայի հետ վարած մեր բանակցութիւնների սկզբին մենք ասում էինք. Անդրկովկասի ժողովուրդները ծարաւի են հաշտութեան, բայց չեն համաձայնւի զնել հաշտութիւնը ստրկութեան ու խայտառակութեան զնով: